

`PCV CE RISOS MO PABLIKESEN “KRISMES STADI”2025”

“THEME: “God i mekem promes blong kam tru long olgeta we tingting blong olgeta istap daon olgeta”

`Sotfala stori blong Buk ia Luk: *Luk hem i tokbaot Jisas se hem i man we God i bin promes long ol laen* blong Isrel bifo, se bambae hem i kam blong i sevem olgeta, mo olgeta man long wol. Luk i raetemdaon long buk* ya blong hem, se Jisas ya, Spirit blong Hae God nao i singaot hem blong i “talemaot gud nius long ol puaman”. Nao from samting ya, gud nius ya we Luk i raetem, i fulap long ol stori we i soemaot se God i gat sore long ol man we oli stap long trabol. Plante narafala samting we yumi faenem long buk ya, hemia ol stori blong ol man we oli harem gud oli glad.*

**STADI WAN: “Plan blong God i kamtru long ordinari pipol”
LUKE 1:26 – 38:**

Stadi lida iaskem kwesten ia: Wanem nao riaksen blong yu sapos wan Enjel ikam visitim yu we yu no ekspektem? (***Givim taem long wan o tu i givim tingting blong olgeta***)

Baebol hemi tokabaot ol Enjel olsem ol mesenja blong God we hemi stap sendem ikam blong talemaot wan mesej o blong oli lukaot mo gifhan long wan man, mo yumi luk hemia long Ofala Testamen, espeseli long olgeta laen blong Isrel. Wan long olgeta wok we oli stap mekem oltaem hemi “Wosip long God”(Mat 18:10, Rev 5:11). Wan tingting se, sapos oli save mekem olsem then from wanem nao yumi we God i mekem yumi i olsem hem(imij blong hem), mo i ded from yumi, ino save mekem laef blong yumi i fulap long wosip?) Evri samting we God i glad blong yumi mekem hemi sut kam pat long wosip blong yumi.

Sapos yumi folem gud stori long baebol long Ol Testamen ikam, bae yumi luk se, storian ya i plei wan impoten rol long plan blong God blong sevem olgeta man. Long taem blong Ebrahim, mo long taem we ol laen blong Isrel iko slev long Ijep. Long taem we God i givim ol loa blong hem long olgeta man man blong hem, mo long taem we ol laen blong Isrel iko slev long Babylon mo Syria. Long taem we ol laen blong Isrel oli go fri mo long storian blong yumi long dei we Jisas Kraes i bon ikam long wol ia, Long dei we Jisas Kraes i kirap bagegen long ded mo ko long heaven mo tu long dei we bambai Jisas Kraes i kam bak bagegen blong tekem olgeta we oli stanap strong long bilif blong olgeta, i soem se ol Enjel oli plei wan impoten rol long Salvesen stori.

Long storian blong yumi, long Luk 1:26-27; God i sanem Enjel Gabriel ikam visitim wan yangfala gel (Meri) blong talemaot wan spesel mesej long hem. I gud yumi faenemaot se, Hu ia hemi Meri mo wanem nao spesel mesej ia?

Hu ia hemi Meri?

Vs 27: - wan Virgin,
- Fiuja woman blong Josef
- God i glad mo gud tumas
lona hem

Spesel mesej iko long Meri?

Vs 31: - Bai hemi gat bel mo
Bonem pikinini boe ya Jisas.
.

Long kastom blong ol laen blong Isrel, oli stap mekem Arenj maret we i minim se, famle blong boe oli blokem wan yang gel long narafala famle blong istap wetem boe blong olgeta. Arenjmen ia oli mekem wan yia bifo dei blong maret folem kastom blong olgeta.¹ Long wan yia ia bae boe mo gel istap seberet mo tufala i ting hevi long ol arenjmen we ol famle i mekem mo tufala i honarem, mekem se tufala ino silip tuketa kasem taem tufala i maret. Long wan yia ia tufala i fetful mo stap long single laef we tufala ino go wetem narafala patna. Tufala i stap virgin kasem tufala i maret. (Long storian blong Meri, baebol i talem se, “Gel ia ino save man yet”(vs 27), be i gat arenjmen blong hem i stap wetem Josef (Mat 1:18).

Kwestin blong tokabaot:

Wanem nao kastom long Vanuatu long saed blong maret? Hemi semak o I difren?
(Stadi lida I givim taem long wan o tu pipol I serem storian long fasin blong maret long wanem aelan oli kamaot long hem folem tufala kuesten ia)

Nao long stret taem we God i makem,(Gal 4:4^a), Hem i sanem Enjel Gabriel wetem mesej blong givim long yang gel (virgin) Meri. **(Stadi lida i askem wan memba i ridim Aesaea 7:14 mo givim taem long wan o tu i givim tingting long kwesten ia: Wanem nao vas ia istap talem long yumi abaot God mo ol plan blong hem?).**

Bigfala toktok we ol man Jiu oli usum blong kritim eni wan hemi “Shalom”, we i minim se “Pis”. Long taem we Enjel Gabriel i visitim Meri hemi talem wan toktok we i mekem tingting blong Meri i trabol (vs 29). Inglis toktok hemi talem “*Hail, thou that art highly favoured...!*” (vs 28), Semak toktok ia i talem tu long vas 30^b.

Bae yu harem olsem wanem sapos wan man i kritim yu long toktok ia? **(Stadi lida i givim taem blong wan o tu i save serem tingting blong olgeta!)**

Long Meri, maet hemi stap harem ol lida blong Jyos istap ridim ol skripja blong aesaea ia be hem ino save se:

- Tingting ya bae ikam tru long hem ya nao; olsem wanem we Aesaea i bin talem bifo abaot wan “we gel we ino save man yet...” bai bonem wan pikinini boe.
- Hem istap long plan blong God blong yusum hem blong fulfilim plan blong hem blong sevem olgeta man.

Long Inglis diksenari, Inglis toktok ia “highly favoured”, hemi minim se: *being blessed, accepted, and graced by God, often indicating a special status or purpose within a divine plan*².

Hemi no from sam gudfala wok o wan samting we yu mekem blong God i favour long yu “NOGAT”; be hemi divine gladhat blong Hae God wei soemaot klia se, hem igat plan blong wanwan man o woman blong fulfilim hat mo tingting blong hem, weta hem i provaedem wan blessing blong yu glorifaem hem long hem, no i kaedem yu long Kristien fet o iven I givim wan duti blong yu mekem blong glorifaem hem nomo. Long Meri, God i luk istret gud blong hem nao bai ikam gel ya we bae hemi kam olsem mama blong pikinini boe ya, mo blong lukaot gud long pikinini ya, we bae ikam wan dei bae hemi kam sevia mo King blong olgeta man long wol ya.

Long stat, Meri hem ino bin kasem gud wanem mining ol tok blong Enjel we ikam visitim hem, imekem se tingting blong hem i trabol tumas from. (Lk 1:29) Enjel i givim stret mesej

¹ Walter A.Elwell. Student bible hand book. (Candle books ltd) 1997. Pg19

² Mining blong tok ia favoured I kamaot long intanet

blong God long Meri. Fastaem tingting blong Meri i trabol tumas from nius ya, mo hemi stap traem tingbaot, from wanem we enjel i toktok long hem olsem mo hemi stap asaskem hem wan se, *“Mi mi no save man yet.? Bambae samting ya i save kamtru olsem wanem? (vs 34).* Kwesten we Meri i askem i folem tingting blong hem wan olsem wan man nomo! Kwesten ia tu i semak long yumi tudei olsem Jyos blong God. Taem yumi mekem plan blong mekem wan misen, be bigfala kwesten se: Bai yumi karem mane wea blong karem aot misen ia? O mi no save olsem wanem blong serem tok blong God, so bai mi joen no mi no stret man blong joen nomo? Ol kaen kwesten ia hemi folem fisikel lukluk mo neiia blong yumi nomo olsem wna man/woman. Long fas 38 afta we Enjel i mekem i klia plan blong God, Meri i harem save, i bilif mo hemi rispon blong givim laef blong hem blong Hae God i yusum hem fulwan from wantem mo bigfala plan blong hem blong sevem wol ya. (Harem mo harem save).

Stadi lida i askem tu memba blong ridim ol riding ia: Wan i ridim Genesis 18: 9-15 mo wan I ridim Luke 1:35-38. Wanem nao deferens blong tufala stori ia? ***(Stadi lida i givim smol taem blong 1 o 2 i serem tingting long tufala kwestin ia.)***

Tufala tugeta, Serah(Jen 18:12) mo Meri ino ekspektem mesej we i kam be wan hemi laf mo wan hemi bilif. Laef blong teknoloji blong tudei i mekem se i gat gudfala akes blong ridim mo harem mesej blong gudnius long Krismas. Maet sam oli ridim mo harem mo laf long hem from stori blong krismas ikam olsem wan olfala stori, be sam oli ridim mo oli haremsave mo oli bilif. ***(Kwestin blong tingting long hem se; “Yu yu which wan? Yu harem stori mo yu bilif, o yu harem i olsem wan olfala storian nomo?)***

Kwesten blong tokabaot long grup:

1. Wanem nao Jyos istap ekspektem blong mekem se, selebresen blong krismas ia i gat ples mo tru mining blong hem long laef blong yumi ol kristin?
2. Wanem nao ol samting we istap tekem ples long krismas, we istap mekem tingting blong yumi trabol, Gudnius no ol trabol nius nomo? Wanem nao ol stret plan mo tok?
3. Meri i respon wetem klia feit taem mesej ikam long hem blong hem nao bai bonem boe ya Jisas. Wanem nao respon blong Jyos long gud nius ia tedei? Hu nao yu ting se bambae i nid blong harem mesej ia? Wanem nao plan blong Jyos blong tekem mesej ia we Jisas i kam long wol iko long olgeta we i nid blong harem gudnius ya?
4. “With God nothing is impossible” Istap talem long yumi se, God hemi Sovereign mo i stret blong yumi trastem hem! Wanem nao sam jalenj blong laef wei mekem samtaem Jyos i lusum fokas blong trastem God mo presentem gudnius blong King i Bon finis?

STADI TU: “Rispon long God long fasin blong obei mo lav”

LUKE 1: 39- 45

Rod blong wokabaot long Nasaret iko long Judea hemi abaot 100km blong wokabaot. Hemi wan rod we i gat denja long hem olsem: ples i drae, hot tumas, mo plante dust taem yu krosem ol hil mo vali mo tu politikel dension bitwin ol man Jiu mo samariten.

Baebol ino talem i klia se from wanem nao Meri imas ko visitim Elisabet? Nomata long ol jalenj ia we bambae hem i fesem long wokabaot ia, yet Meri igo.

Stop long ples ia mo stadi lida i askem kwesten ia long ol memba: *Tingabaot ol jalenj blong rod we Meri i wokabaot long hem mo tu kondisen blong hem we i gat bel. Wanem nao yu tingse i mekem Meri i ting hevi blong igo visitim Elisabet? (Stadi lida i givim smol taem blong wan o tu memba i serem tingting.)*

Long kastom blong ol man Jiu, hemi wan nomol samting blong ol famle i mekem visit iko long nara klos famle espeseli taem wan woman hemi gat bel. Visit blong Meri blong go luk Elisabet hemi from Elisabet i wan famle blong hem be narafala lukluk se, maet Meri i wantem tumas blong luk Elisabet blong felosip wetem hem mo tu we hem i kasem semak merikel blong gat bel we long laef blong Elisabet, hemi pasem olfala yia blong hem we ino save karem pikinini bagegen be naoia hem i gat bel. Wokabaot blong Meri iko luk Elisabet i soem gladhat mo Joy we Meri igat mo bilif blong hem long wanem Enjel Gabriel ibin talem!

“Excitement blong wan Gudnius i shud givim Joy long yumi blong wantem visitim narafala mo serem lav blong God long olgeta.”

Fasin we tufala ya i gat bel long lukluk blong man ino posibol nomo. Long situesen we wan i olfala mo ino mo save karem pikinini. Be naoia hemi gat bel, mo wan we neva man i stap wetem hem, be igat bel tu, tru long paoa blong Tabu Speret. Hemia i stap soem klia paoa blong God blong stap fulfilim ol plan blong hem wetem yumi man! Wanem i had long God?

Baebol italem long vas 41 se, taem Meri ikam tru long haus blong Sakaraea mo Eliabet mo hemi kritim Elisabet, pikinini insaed long belly blong Elisabet i muf from we iglad tumas mo Tabu Speret i fulap long Elisabet.

Stadi lida i askem wan patisipan i ridim vas 42 kasem 45. Afta Stadi lida i givim taem long wan o tu i givim tingting long pasj ia: Wanem nao i interesting long ol vas ia?

Luke 1:42-45:mo hem i singaot bigwan, i talem se, “Meri. God i blesem yu moa i winim ol narafala woman, mo hem bambae i blesem pikinini ya we yu bambae yu bonem. Mi mi glad tumas long bigfala samting ya we i hapen long mi, we mama blong Masta blong mi i kam luk mi. Taem mi harem tok blong yu, pikinini ya we i stap long bel blong mi, i muf, from we hem i glad tumas. Bambae yu **yu save harem gud**, from we yu **yu bilif we promes blong hem bambae i kamtru.**”*

Singaot long joy blong Elisabet hemi fastaem preisem God from wanem i hapen long Meri hemi long gladhat blong Hem(God) nomo blong jusum Meri blong ikam mama blong lukaot long Pikinini Boe ya Jisas. Olsem yumi lanem long stadi wan se **“Hae God i mekem igud tumas long Meri mo hemi stap wetem hem..”** (vs. 28) mo God hemi blesem hem from hem i bilif(vs 45).

Long Elisabet, visit blong Meri i leftemap tingting blong hem mo tu i mekem hem i fulap long joy. Long ples ia, Elisabet i luk save mo i konfemem Jisas olsem Masta blong hem. (Vs 43b) Be Joy ia ino Elisabet hem wan i filim, be pikinini ia long bel blong hem tu i muf tu from i glat. (vas 44^b ‘... **pikinini ya we i stap long bel blong mi, i muf, from we hem i glad tumas.**’)

Stadi lida i givim smol taem blong wan o tu i serem lukluk long wanem yumi save lanem long Joy we i kasem Elisabet mo Bebe we istap long belly blong hem.

Meri ikarem wetem Hem Pikinini blong God (Jisas Kraes) thru long paoa blong Tabu Speret. Jisas kraes ia we long hem, yumi liv, yumi muv mo yumi laef fisikali istap insaed long bel blong Meri, mo presens blong hem i givim joy long mama mo pikinini ya. Hemi stap konfemem promes blong God long Sam 16:11^b: “Nao taem mi mi stap wetem yu, bambae mi harem we mi glad tumas, tingting blong mi bambae i glad oltaem nomo.” Presens blong God bae i bringim joy oltaem, ino hemia nomo be Neh 8:10 hemi talem se, **“Yufala ino mas**

harem nogud, from we dei ya i tabu, i blong Masta* ya blong yumi. Oltaem hemi stap mekem yumi glad, mo fasin ya istap mekem yumi strong.

“Long presens blong God yumi eksperiensem Joy, Joy ia hemi paoa blong yumi”

Long taem blong krismas, ol Kristien man raon long wol i fulap long Joy from oli selebretem mo tingbaot we Jisas i kam long wol ia olsem “Man” blong i sevem ol pipol long wol ia.” Hemi wan Joy wei klin mo tru, wan Joy we yumi no save miksim wetem narafala samting from i fulap gud wetem gladhat blong Papa God long yumi olgeta man!

Wan samting we imekem istrong gud trutok long Elisabet, hemi Tabu Speret. (Vs41^b) ***Nao Elisabet i kam fulap long Tabu Spirit... (John 16:13 – ‘Be taem Spirit ya we i Stamba blong Trutok i kam, hem bambae i save tijim yufala long olgeta tok we i tru.*** Trutok ya nao imekem man i friman tru. Mo tu taem man wei fri tru hemi lafet, lafet hemi i klia nomo se hemi stap wosipim Pikinini ya we hemi sevia mo prins blong Pis!

Tabu Speret i helpem yumi blong luk save wok blong God we narafala man imekem. Elisabet i selebretem fet blong Meri blong bilif se, promes blong God bambae i kamtru long hem.

Ol kuestin blong tokabaot:

1. Disisen blong Meri blong visitim Elisabet i stap tijim wanem long yumi abaot godly felosip mo selebresen?
2. Wanem step blong fet nao yu ting se God i stap wantem yu tekem long tis krismes selebresen?
3. Olsem wanem nao yumi save luksave presens blong God long selebresen blong krismes?

STADI TRI: “Fet long God I bringim Joy”

LUKE 1:46 -55

Stadi lida i askem wan patisipan i ridim Luke 1 :46-49

Afta long profetik blessing blong Elisabet long Meri, Meri hemi respon blong sing preis iko long God. Wanem nao yumi save lanem long singsing ia blong enkarejem yumi blong selebretem Krismas ia wetem tru tingting mo mining blong hem.

Long vas 47 – 49,

Long ol vas ia, Meri i preisem God from wanem we God i bin mekem long laef blong hem. Long wei we God i jusum hem nomata long bakgraon blong hem we hemi kamaot long laen blong olgeta laen blong Isrel we oli nogat tumas samting o oli nogat taetel. Hemi wan sosaeti we man i wantem tumas posisen, paoa mo hae nem. God i luk long hat blong Meri mo i Jusum hem. Long singsing ia yumi save luk hat blong Meri wei pore aot igo long God olsem rispon blong hem long tok blong God thru long Enjel Gabriel:

- Meri i biliv long tok blong God ia mo i givim laef blong hem blong God i yusum long glori blong hem.
- Meri i putum tingting blong hem istap daon mo hemi luksave se hem i nidim Sevia
- Meri i luk save se wanem we bai hapen long hem, hemi wok blong Tabu Speret blong God nomo.

V46-47: Long olgeta laef blong mi, mi mi stap leftemap nem blong Hae God*, mo long tingting blong mi, mi mi glad tumas from God ya we i sevem mi.

Long inglis hemi talem: **“My Soul glorifies the Lord”**..Wosip blong Meri iko long God blong rispon long mesej hemi long ful laef blong hem(*Bodi, soul mo speret*). Wosip ino jes blong singsing nomo o prea nomo, be hemi wan rispon long olgeta laef blong wan man/woman long wanem God i mekem long laef blong hem. Krismas ino blong presen, kaekae, o singsingaot krake olbaot, be hemi wan gudfala taem blong wosip mo ona long God wetem klia tingting, hapi laef mo ol aktiviti we i givhan blong givim glori mo ona long God nomo oltaem, from gladhat blong sevem yumi olgeta man thru long laef mo ded blong Pikinini blong Hem Jisas Kraes.

v48: Mi mi gel blong wok nomo blong hem,we mi mi daon olgeta, be hem i stap tingbaot mi. Mo i stat naoia,bambae olgeta man oli save talemaot we God i blesem mi,

Meri i biliv long promes ia we Enjel ikam talem long hem mo wetem tingting we istap daon mo blong letem hem fulwan blong Hae God i yusum hem. Wan yangfala gel olsem nomo, be laef mo hat blong hem, Hae God i yusum blong karemaot bigfala plan blong sevem wol ya aot long paoa, laef mo fasin nogud we istap spoem ol man plante tedei. (1 Korin 1:27-29) God i wok long laef blong eni man from plan mo pepos blong hem wanwan long yumi!

v49: From we God ya we i gat olgeta paoa, hem i mekem i gud tumas long mi. Nem blong hem i tabu,

Biaen we Enjel i konfemem promis ia we Meri bai igat bel thru long paoa blong Tabu Speret, Meri i luksave fulwan se ino long tingting mo paoa blong man be God nomo i mekem samting ia kam tru from Hem i God we igat olgeta paoa!

Meri i luksave fulwan tu se God ia we istap fulfilim olgeta promes blong hem wetem man, hemi wan TABU God mo ino gat wan God moa i olsem hem!

PCV Jeneral Asemli i lukluk long stadi ia “Purity of the Church” mo hemi singaot long Jyos long wokabaot ya blong yumi ol memba iko long fiuja. Hemia istap soem long yumi se, **taem yumi fokas long God we i Tabu**, istap talem lomg yumi se, **Tabu laef nao isave reregud long wan wosip speis blong yumi wetem God** (Lev 21:8, Eksods 19:6, 1 Peter 1:16).

Meri i selebretem wanem we God i mekem long laef blong hem. Bae yu yu selebretem wanem?

Kwestin blong tokabaot long grup:

1. Wanem nao i kamaot we i klia long rispon blong Meri?
2. Wanem nao Stadi ia i stap tijim yumi abaot wosip mo fasin blong putum tingting istap daon oltaem? Olsem wanem nao bai yu aplaem long selebresen blong Krismis ia?
3. Wanem nao plan blong sesen o CLC blong selebretem wanem we God I mekem?

“GAT WAN GUDFALA KRISMES MO YUMI SOEMAOT LONG LAFET BLONG KRISMAS WE GOD ISTAP WETEM YUMI OLTAEM”!